

Eletar yay étiar yo Pool ahič me Tímonte

Waf waw wabaj me n'eletar yauye

Ñammeñe, Tímonte nauneniwunen n'élebur yay yaa Mukanay Uþotoraaw ni þop ni siletar sasu saa Pool. Maagen mamu, Tímonte arambena omene ala Pool ni burokol. Nátinenol n'újaorol wammeñe. Pool naboñol ajow ulago wátañie, fáñum wo najow me bi Tesalonik ni þop bi Korent.

Pool nahiče Tímonte siletar súuba. Siletar sausu sihiči no ejangara gútiar guju me éinen, no gúçit jangu yauyu guileni me guban. Maer ñer ñañool esen sijangu sasu gailo gagu gájahor me ni þop elijen gáinen gagu gala so.

Eletar yay étiar yay ehičihič bi **etar ejangaraay, ufan sijangu sasu, ni þop ačila Tímonte fanjaol.**

Baje ejangara guce guman bugo nihi gubet bugan bugagu ni galim ni baloberil (1 Tímonte 1.3-7 ; 4.1-4 ; 6.3-5). Ni bajugeril buroñ babu bal elip wásüm me enil buarat, yaçil me n'gulat waf waa búyabo, ni þop etiñ mitiñay micemo. Ban wo Aláemit átut me pée úariari. Dáuru Tímonteaat me aosen ejangaraay.

Ni guomunor ejangaraay baj ró ufan sijangu sasu gáçibbeneil me ban nihi guligenil ; babaj ró may bugan bugagu garambeneil me ban ni gurok bi mala galeh me ni þop bi mala úsotaaw.

Bugaa guomunor gaugu gusoholae eroŋ ni gásumay, gusoholae ƿop min ésuh yay guruhenil. Pool nahiće eletar yauye bi etar bugan bugagu mala bu guot me nihi gukan bíteŋen babu, ni may bu guot me nihi gulaw nogor (1 Tímonte 2). Nagitene ƿop bu ufan jangu yay guot me guroŋ nogor (1 Tímonte 3).

Tímonte ƿayol an mo ala mof mamu maa Geres ; jaol, o, ajangara Asúif átut omene. Tímonte Pool aogenol min aligenol, yaçil me náni ti añil áþullo ni farol. Nabile áni ácibbenabugan, afan ala sijangu. Pool n'eletar yauye nagitenol búoh naate anamo aroka aaro ala Yésu Kirista. Nagitenol may bu náari me ajoh guñen gúuba ajangara ánoan dó ni guomunor gagu, ni ƿop wo naat me aligenil ban nah'ataril.

Basaf babu baa Pool

¹ Injé Pool aamme apotora ala Kirista ihićuli eletar yauye. Aþagenaolal Aláemit ni Yésu Kirista o núhagumal me ni o, bugo gumanye min íni apotora. ² Injé ihićuli eletar yauye, aw Tímonte, aamme añolom ala maagen ni gáinen gagu : mbi ƿayolal Aláemit ni Ataolal Yésu Kirista guseni gáji, ñarum enil ni gásumay.

Mala ékanum uligenaaw gálodit me maagen

³ Ti nilai yo me no niomme n'ejow mbaa Masedonia, urobo ƿan dó Efes dó nuom mee. Baj dó bugan gaam n'eligen ésuh yay gurim gannamut ni wo núninenal me ni wo. Nuote úfirenil ekan burok ti baabu. ⁴ Uogil guhat urej waw wañulout mee, guhat ƿop eþinen sipaya gufan yámusut

ebao : úru ndi ramben bugagu ni gáinenil min guffas waf waw wo Aláemit aamme n'ekan, bare síceñor bare nihi ñárul. ⁵ Nilobilob maa min mbi gurimom guinnul ni bugan bugagu gábbolior gáþullo n'éçigir yakure ni biinum baaro, sammeñe gáinen gaa maagen. ⁶ Baje hum bugan guce gahalene dáuru þe dauneni mee min gunogen ni síceñor sabajut nafa yánoyan. ⁷ Gumanje gujogil uligena búgamah bugaa gúboñ Aláemit, bare gurim gagu go bugo fajail gulobe me gujogut go, hani sulob sasu so gulobe mee ni gafium dó.

⁸ Nuffasale þe búoh gúboñ gagu gaa Móis waf waaro, íni me nunabenale ni wo gulob me. ⁹ Nuffasale may búoh gúboñ gaugu let bi ni bugan bugagu gakane me maaro gúomum to, bare til bi n'ukana-maarat bugagu, bi ni gaceñe me ekan wo gulobil me, bi ni gálaput me ni utilaaw, bi ni gákanumut me Aláemit ni wánowan wanab me, bi ni gamuge me sipail ter sijail, ter bugagu, ¹⁰ bi ni bugagu gafiyé me ni aletalet, bi ni wáineaw gafilene me gupalil wáine, bi ni gannomene me umigel, bi n'ubijaaw ni bugagu gabbate me ni jibij ró, ni bugagu þe gakane me waf uce mul wannamut ni baligener babu baa maagen. ¹¹ Baligener baubu ni Firim fafu Fásum me bujoumulo, falob me mala bájalo Aláemit ammenj me gasal. Nafiumomfium bireg nasenom fo min mb'ivare fo.

Pool o n'esal Yésu Kirista mala músumol

¹² Injé umu n'esal Ataolal Yésu Kirista, mala min ajoh me búoh niþiloþilo bi éni aroka ola,

ban nasenom sembe sasu sal ekan burok baubu. ¹³ Hani min iloben me maarat iya ni o, min iyogenenol me, min ijelenol me, bare Aláemit narumom enil mata iffasenut wa nikanene, ban gáinen gánogan gulelen n'íne. ¹⁴ Maagen Ataalal Yésu Kirista nammenenom gájiol iki gupus, min ñer asenom gáinen ni gábboli so gajogor gagu ni o nihi gúñarul me.

¹⁵ Firim ufe faa maagen faþiloe min bugan bugagu þe gukan fo ni gaþin : Yésu Kirista najoulojow ni mof bi epagen bugan bugagu gatile me, ban ínje gatilom gufanje wolil þe. ¹⁶ Bare Aláemit narumom enil min Yésu Kirista agiten gamutenol þoogo go náju me n'íne, aamme atila ahu átiar. Nakanmokan min mbi ní fútalloum bi ni bugan bugagu gajae me énen ni o, ban ni guyab buroñ bábaerit. ¹⁷ Mbi bugan bugagu þe gumigelet ban ni gusal Aláemit bi nánonan, açila aamme Aví ahu ala bándor añumut me émus aêet, o an mát'áju me ajuh, aamme Aláemit ahu anur pat ala maagen ! Amen !

¹⁸ Añolom Tímonte, niseni ñer firim faufe fannam me ni wo Aláemit alob me míya n'utum waa bugan þio bo. Ujoh gurim gaugu ti nihi gúni me mitiguma min mb'úju utih fitih fafu fáari me, ¹⁹ aw n'ejoh gáinen gagu gúiya guñen gúuba ban nubaj biinum bakure. Baje bugan bugo uinumil ukurut galale ekan mo, ban ñer guçile mamu min gáinenil gullim. ²⁰ Baje ni bugan bugaubugi Himene bugo ni Alsandul, bugo nihat me ni guñen gaa Seytane min mbi guteh mahat mala gújel gagu go gujèle me Aláemit.

2

Mala elaw bi ni bugan bugagu þe

¹ Firimom fáamumma fo fuomme min uakenal ni galaw n'écin nímoro Aláemit bi ni bugan bugagu þe. Nuotale ufotenoral bújonjorol ban nusalalol mala wo nakanolal me þe. ² Mbi galaw gukani bi ni úviaw ni bugagu þe gaamme ni guhow gagu, tima nújual uroñal buron bájebie, baa gásumay, bo an mat'ajel, dó þe min úkanumal Aláemit ban nuroñal buron baþiloe eyab gasal. ³ Dáuru diári me ban ni dúsúm Aláemit aamme aþagenaolal, ⁴ aman me bugan bugagu þe guyab gaþah ban ni jáenumil iki guffas maagen mamu.

⁵ Maagen mamu Aláemit anur pat abaje, ban þop ajaa-bulago anur pat abaje tutor Aláemit ni bugan bugagu.

An ahumu o aamme Yésu Kirista,

⁶ asen me súñunduol bi eallor utilolal wolal þe. No tinah talu to Aláemit aþi me naçob tiçih me, Yésu Kirista nakan mo bi egiten me búoh Aláemit namamañ min bugan bugagu þe guyab gaþah.

⁷ Dáuru diçil me min Aláemit açobom íni aloba-uhonjen ni þop aþotora, bi egiten bugan bugagu galet me Esúif wa uomme gáinen ni maagen. Ibijut, maagen mamu nilobeul.

Gailo gagu go áname ni anaare guot me gubaj ni jangu

⁸ Nimanje ñer tánotan wáineaw guteben guñen gakure mbal émit min gulaw m'babajut bitiña-fiñ ter biinum baa gárig.

⁹ Nimanje may waareaw nihi gusimo jon, jambi lejeho, jambi þop̄ sanumeto ; jambi gueçō gueçō gattinenie, ter gúibor úibor wal éurus, ter waa banuh, ter mul bisimo básumut ebaj, ¹⁰ bare til gukan maaro, ti jáhor me ni waare gaage bugo Aláemit gúkanume. ¹¹ Waareaw guote gualenoro ban ni guþanor an baamer n'eligenil. ¹² Ijíut min anaare nah'aligen bugan, ter min ágogen ánaïne ; naate ajoh butumol. ¹³ Leti Aláemit Adam namundum me áuwen, mbiban Eva ? ¹⁴ Ban Seytane let Adam nabute, bare til aarema, min alo mamu ni gatil. ¹⁵ Bare hani mo bae, aare ahu þan ayab gaþah o babuger uñil, íni me najoge líñ ni éinen yay ni Yésu, íni me nábbolie gupalol, íni me naroñe buron̄ banabe, íni me may naalenoroe.

3

Ufan waw bugaa jangu yay

¹ Firim faufe mifiumay faah me : An ni buru aman̄ me áni ni fuhow jangu yay, an ahumu namañe ekan burok babaje hámma. ² An aam ni fuhow jangu naate áni an o mati bugan bugagu gubaj waf wáhojie gulob guya ni o ; naate ayab anaare anur, naate áni an ájue ejogoro, an o nd'akan gáaç, an ájebie, an ájue ealen bugan yanol wári, an ájue eligen bugan bugagu. ³ Aatut áni áhalla, aatut þop̄ áni an ala fiiñ, bare til naate áni an abubie, an ala gásumay ; jambi ní an amanje síralam nár. ⁴ Naate may áni an ájue ejoh yanol wári, an o guñolol gúttune firimol ni gákanum dó. ⁵ Maagen mamu, an ájuut me

aogen yanjal fanyaol, bu ñer þan áju me acokor Jangu yay yal Aláemit ? ⁶ Jambi þop áni an ajue éinen ni Yésu Kirista ; let mo, þan ateben ubandol nár ban may Aláemit þan ategol ti nateh me Seytane. ⁷ An aam ni fuhow jangu naate þop áni an o bugan bugagu galet me ejangara may gúkanume, mamu jambi bugan bugagu gulalol ban nalo ni fumbal fafu faa Seytane.

Urambenaaw bugaa jangu yay

⁸ Urambenaaw ni burok babu baa jangu yay guote may gúni bugan bugo gufiume, guotut gubaj gurim gúuba ; guotut nihi gurem bunuh iki gúgatten, hani may elip ebut bugan min gubaj síralam. ⁹ Guote nánoran gujoh liñ m'biinum bakure maagen mamu mo Aláemit agitenolal me min úinenal. ¹⁰ Pan gáinenil gumundum gúlingeni ; mbi bajut me maarat majugi ni bugo, no ñer þan gúju me gúni urambena bugaa jangu yay.

¹¹ Waareaw urambenaaw may guote gúni bugan bugo ésuh yay gufiume, ban may guotut nihi gulob n'ujow bugan. Guote gúni bugan gájue ejogoro ban ni gúni bugan gufiumay ni waf waw þe. ¹² Arambena ala jangu ánoan naate ayab anaare anur ; naate áju eogen jon yanjal þooyo bi ni guñolol ró. ¹³ Arambena ala jangu akan me burokol wári, nah'ababaj gailo gaaro ban náh'ájuju alob ni gakañen dó mala gáinen gagu go nubajal me ni gajogorolal ni Yésu Kirista.

Waf waw waa gáinenolal waffasenuti me

¹⁴ Tímonte, ínje umu n'ehiçuli eletar yauye ni gafium gagu ró gaa búoh mati þio nikeli bujuh.

15 Bare íni me ejoulom ban epio, eletar ye þan egiteni bu nuot me uron nogor ni Jangu yay yal Aláemit, yaamme fil fafu fal Aláemit ahu aron me. Fiil faufu fo fuomme erujen yay ni fúhag fafu saþem me maagen mamu. **16** Ey, an ájuut acen yo, waf waw waa gáinenolal waffasenuti me újalojalo :

Aláemit nagitenoroe ni gáni gal arafuhow,
 Biinum Banabe bigitenolal gaþolol go naþol me,
 ban emalakaay gujugol ;
 gajaol guvarei ni súsuh sasu þe,
 bugan bugagu bugaa mof gúinene ni o,
 ban natebeni bi fatiya n'émít ni gasal ró.

4

Ecaf mala baligener babu balet me baa maagen

1 Ban bae Biinum Banabe bulobyolob ñanno ca búoh ni gunah gagu gúsola bugan guce þan gubelen gáinenil min nihi gúttun balober babu babute me ni baligener babu baa siseytane sasu. **2** Pan guhat bugan bugo uinumil uþele, gálodit maagen, min gullimenil. **3** Ubijaaw ubugi guligeneligen bugan bugagu búoh jambi guyab ban jambi gutiñ mitiñay micemo. Ban bae Aláemit nátutul mitiñay maumu min mbi bugan bugagu gáinen me ni o, gaffas me maagen mamu, gulaol ban ni gusalol balama gutiñ mo. **4** Waf waw þe wo Aláemit átul me úariari ; bajut uce wo mb'úfireni fitiñ, samen balama utiñal wo, numundumal ullaal Aláemit ban nusalol, **5** mata firimol ni galaolal þan siçil wo min úni wola.

Ení aroka aaroala Yésu Kirista

⁶ Ugiten me gurim gauge gutiolal ejangara, þan úni aroka ala maagen ala Yésu Kirista ; yo þan egiten me búoh biinumi bimmemmen gurim gagu gaa gáinen gagu ni baligener babu baa maagen bo nuyab me ban nuronj ti bulob me.

⁷ Bare urej waw wañulout mee wajaorut mee ni gainen gagu, wo, utey wo. Ulingen eroj nánonan ni gajogor gagu n'Aláemit. ⁸ Maagen mamu, egoren enil ebaje nafa, bare nafa yauyu ereut miñ ; bare gajogor gagu n'Aláemit, go, gubabaj nafa ni waf waw þe, mata gúñareulñar gásonien bi ni buroj babu baa jama ni þop babu bájaeul me. ⁹ Firim faufu firim fom faa maagen, ban fiþiloe min bugan bugagu þe guyab fo. ¹⁰ Dáuru diçil me min wóli jíni n'etaj ni burok, mata gáhagumoli jibangobañ n'Aláemit ahu aroj me aamme Aþagena ahu ala bugan bugagu þe, ni fañ ala bugagu gáinen me. ¹¹ Ugiten bugan bugagu gurim gaugu þe, ban may nuligenil ekan wo gulob me.

¹² Jamb'uhat an min acotiheni mala min ukán me añil, bare úni bilihorum bi ni bugan bugagu gáinen me n'Aláemit, ni baloberi, ni bakaneri, ni gábbolii, ni gáineni ni þop min ukán me an akure bújonor Aláemit. ¹³ Balama þan içigul, mbi nuh'ujanga Bahícer babu bújonor ésuh yay þe, mb'uaken n'evareil ban may nuligenil. ¹⁴ Jamb'ulejehen gáji gagu gaa Biinum Banabe gaamme n'aw, go nuyab me no Aláemit alob me míya n'utum waa bugan, no ufan jangu yay guremben me guñenil ni fuhoi min gúsonieni. ¹⁵ Uilo ñer fañ mala burok baubu þe, usenoró

þooi mala bo ; mamu bugan bugagu þe þan
gjuh bu nuaken me n'eaor yay yíya n'Aláemit.
¹⁶ Ukánum wo nukane me, núkanum þop wo
nuligene me bugan bugagu. Uaken fanj n'ekan
yay dáuru þe, mata ukán mo me, Aláemit þan
apagenul, aw ni bugan bugagu gauttenei me.

5

¹ Jamb'unnur gáfanum gáine bannur bátañie,
bare til ulob ni go ti nihi ní me þai nulobe
ni o. Ujoh úpur waw ti nihi ní me gutii,
² waareaw gáfanum me, bugo, ujogil ti sijai,
waareaw upuma jambi biinumi biteb bi ni bugo,
bare ujogil ti gúlini.

Mala eraben waareaw bugo wáinil guçet me

³ Ucokor wári waareaw bugo wáinil guçet
me gabajut me an arambenil. ⁴ Bare íni me
anaare o áinol aêle nabaje uñil ter gabulaken,
uñiaw ubugi guote gumundum guligen ekan dó
yanjl wo bulagoolal buoren me, tima n'gúju
gubbañen ubugail maaro mamu mo gukanil me,
mata dó waf wom wásume Aláemit. ⁵ Anaare
o áinol aêle ban abajut an ajae ecokorol,
n'Aláemit náhagume, ban etufunaha n'efuga
umu n'elaol to me m'báelout tima narambenol.
⁶ Bare ahu o nuffas me búoh gapinorol þe
ejes másume mamu maa mof, o naêle aban,
hani min bae aamme ni buronj. ⁷ Waf wauwu
nuote útallenil jambi baj maarat mo bugan
bugagu gújue gulob guya ni bugo. ⁸ An acokorut
me buganol, ni fáñum bugaa yanjl fumumol,

an ahumu nahalekalen gáinen gagu gola, ban nafanje gaarat an áinenut.

⁹ Anaare o áinol aêele, balama gajaol guhiîci dó waa waareaw bugo wáinil guêt me uhiîci me bi eyab garamben, naate abaj fañ símit úvi gúfaji (60), ban náni anaare átije n'ánaíne anur pat. ¹⁰ Mb'áni anaare o bugan bugagu gujuge búoh bakanerol búariari : áni anaare ahure guñolol wári, anaare o nah'ayab sijaora yanjal wári, anaare apose guot bugan Aláemit, anaare arambene bugan bugagu gaamme ni sîlam ban nah'akan waf wánowan waaro.

¹¹ Bare waareaw bugo wáinil guêt me garonj me þan ni físimil, bugo, jamb'uhiç ró ujail ; mata no gujae me ebaj gafoga gagu gal ebbañ gúyabo, þan gúvu Kirista búsol, ¹² ban ñer þan gulo ni gatil mala min guþirih me gajogoril gátiar ni o. ¹³ Ban þop, þan gubaj gaþulen gagu gal enamo m'bakanut wáfowaf min nihi gunonor sañ bugan bugagu ; bare wafañ me þe gaarat ni bugo, wo uomme min gujae me ébbañul gúni bugan gammeñe elob ban ni gumeneño, nihi gulob sulob sañajutil. ¹⁴ Yo eçil me nimañ waareaw garonj me ni físimil bugo wáinil guêt me gubbañ gúyabo, n'gubaj uñil ban ni gukor sañil, jambi usenal ulatorolal bulago bal elob maarat guya ni wolal. ¹⁵ Nilobul maa mata guce ni waareaw ubugi gufaene gujunden bulago babu báari me min gulagen Seytane. ¹⁶ Eno me baje anaare áinenre ni Kirista abaje ni buganol waare bugo wáinil guêele, naate arambenil ; aatut ahalil n'gúni bíteb bi ni jangu yay, tima jangu yay néju

eramben bugagu waare bugo wáinil guçet me gaamme maagen mamu nevonil.

Mala ufan waw bugaa jangu yay

¹⁷ Ufan waw gaogene me jangu yay jon guçiloe eyab gasal ñáuba, fájum bugagu gaamme ni bíteb babu baa gavare ni eligen nímoró bugan bugagu Firim fafu Fásúm me. ¹⁸ Maagen mamu Bahícer babu buoge : « An mat'unjar gákany uop ni butum ébe yaam n'ehah ble min úfiren yo gafen*. » Buoge may : « Aroka naate ayab bacamol. »

¹⁹ Jamb'úinen sulob so gutege anafan, íni let bugan gúuba ter gúfaji gamate no sibaj me gukelo gulobi yo. ²⁰ Anafan atil me, unnurol bújonor bugan bugagu þe min mbi bugagu may gúholi ekan ti o.

²¹ Injé ñer umu n'elai fañ bújonor Aláemit, bújonor Yésu Kirista, ni þop bújonor emalakaay ganab me iegi : Ukan wo gurim gaugu gulob me m'balujut n'uul bugan bugagu, m'bajogut an afan apalol ni bakaneri. ²² Jamb'usommen me n'enjar guñeni uremben ni fuhow an bi eñendol áni afan jangu, mata akanut me burokol ti naat me akan bo, gahajenol þan jugum go ; úni nánonan an akure.

²³ Jambi nuh'urem mal barebare ; nihi may urem bunuh jatiito min úsoten buruma ni fari, mata núsotoresotor nár.

²⁴ Guce utilil ujugeijuh ñanno ca balama gutaliñil ; bare guceil, bugo, wolil búsol til

* **5:18** 5.18 Juluj Dáteronom 25.4

nuh'ujugi. ²⁵ Bakaner baaro, bo may nihi bujugi-juh ḥanno ca, ban hani babu bo ndi bufaen me bujugi bújuut bukop búni to me.

6

Mala umigel waw

¹ Bugan bugagu þe gaamme ni fimigelet guote gujoh ufanil bugan gapiloe eyab gákanum gámah, mamu jambi an abaj bulago bal ehajen gajow Aláemit ni þop baligener babu bo nuligenale me bugan bugagu. ² Umigel waw bugo ufanil gúinen me ni Yésu guotut guceñ ékanumil mala min guomme gutiil bugo gugum me gáinen ganur ; guote til gufan n'guroke bi ni bugo, mata bugo may bugan bugom gánene ni Yésu bugo gúbbolie.

Dáuru nuote uligen bugan bugagu ban nukanil min guaken n'ekan wo nulobeil me.

Ekánum baligener babu balet me baa maagen

³ Iní me an naligene bugan bugagu bulago bice bábulie min ahabo gurim gagu gaa maagen gal Ataolal Yésu Kirista ni þop baligener babu bajaor me ni gáinenolal, ⁴ an ahumu nammemen batennoro ban may affasut wáfowaf. Násomusomut gásomut gaa síceñor ni gárig maa gurim ; dáuru nihi diinnul me ésilaet, gárig, gújel, epinor maarat uya ni an, ⁵ ni þop síceñor sábaerit tutor bugan bugo uinumil uçele mala min gubbañut me guffas maagen mamu. Bugan bugaubugi guþinore búoh éinen n'Aláemit bulago bom baa bi ni fubaj. ⁶ Maagen, éinen n'Aláemit fubaj fom fámah bi n'arafuhow,

íni me naree ni wo nabaj me. ⁷ Maagen mamu bajut uce wo nuñallale ni mof me, ti may nújuutal me úpunnal ró uce újaenumal. ⁸ Yo eçil me, ubajal me utiñal ban nusimoal, wote þiloolal. ⁹ Bugan bugagu galipe me fusanumet nihi gulolo ni gabut ; nihi gulolo n'ékotondinj yay yaa gafoga gámah gasoñete ban ni gúholeni go nihi gújaenumil bi ni gahajen ni gallim. ¹⁰ Maagen mamu, ebaj gaija gaa síralam yo néh'éñarul maarat mónan. Bugan guce gubabaj gaija gámah gal ebaj so bireg ni gupil guhat gáinen gagu min ñer gúruroro ni sílam sammeñe.

Pool o n'etar Tímonte batar búsola

¹¹ Bare aw aamme an ala Aláemit, utey dáuru pe, ban nuliþ ekan waçol me, waamme éhagum n'Aláemit, gáinen, gábboli, emuten ni gabubi. ¹² Utaj bútaj babu báari me baa gáinen, ujoh to liñ buronj babu bábaerit me bo Aláemit avogi me bi ni bo, bo nulob me mala bo aw n'egiten gáineni bújonor bugan gammeñe. ¹³ Injé umu n'elobi bújonor Aláemit asene me waf waw pe buronj, ni þop bújonor Yésu Kirista alob me gurim gabubie gaa maagen fáçil Pons Pilat ¹⁴ iegi : Ukan wo nilobi me, ban nujoh to liñ jambi an áju alob to uce, bi no Ataolal Yésu Kirista ajae me ébbañul. ¹⁵ Ebbáñul yauyu þan ekano tinah talu baçiger to Aláemit akiç me :

Açila aamme Aví ahu anur pat ammenj me gasal, afañ me úviaw pe,

Ataw ahu afañ me bugagu pe.

¹⁶ Açila bare añumut me émus açet ;

ni gajaŋa naćine go an mät'áju alof.
 Bajut an ámuse ajugol,
 ban an mät'áju ajugol.
 Gasal ni sembe sábaerit síni ni o bi nánonan !
 Amen.

¹⁷ Uoh bugan bugagu gasanumet me fusanumet faa buroŋ be jambi gutennoro, ban may jambi gubaŋ gáhagumil ni gubaj gagu gañumut mee eþio, bare til gubaŋ go n'Aláemit asenolal me waf waw þe m'baþinut, min mbi úsumaetal ni wo. ¹⁸ Ulobil min nihi gukan maaro, mo mbi míni me fubajil. Uogil gúni bugan gásumé gájue egabor wafil ni bugagu. ¹⁹ Mamu, þan guomen bi ni bugo fubaj faaro ban ni fiþio bi gajem, min mbi gúju guyab buroŋ babu baa maagen.

²⁰ Aw Tímonte o níbboli me nár, ubaŋ joon waf wauwu þe wo Aláemit aseni me uogen. Utey sulob sasu sabajut me nafa sannamut me ni gáinen gagu gololal, ni pop síceñor sasu saa bugan bugagu gabije me n'guoh bugo gaffas gace gubaje. ²¹ Maagen mamu, guce gumandore ebaj gaffas gaugu, ban gupile guhat gáinen gagu.

Mbi Aláemit ásonienul buru þooul !

**Firim fafu fal Aláemit
Bandial: Firim fafu fal Aláemit Bible**

copyright © 2015 Wycliffe Bible Translators, Inc.

Language: Bandial

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 21 Feb 2024 from source
files dated 29 Jan 2022

2256a388-b3d0-5a86-9a2f-8ea0a837d026